



滇臺行稿卷之三

雲南等處提刑按察司為添設獄官以制囹圄事
本司呈添設武定府獄官印信緣由為照法紀所
以繩頑民獄禁所以繫囚犯故立法當嚴而設獄
須慎也雲南各府皆設有司獄官典而惟武定一
府先年係土官管事原未議設今既改土設流獄
禁誠為緊要尤必添設獄官庶有責成蓋該府僻
在邊夷之地當反側初平之時誠當嚴為之防今
據該府所呈比照尋甸府添設獄官一節似應准
行合候詳允請乞

本院照依尋甸等各府事例奏

請添設該府司獄官一員頒降司獄印信仍設獄典一名協同禁役看守獄囚庶犴狴慎密而無疎虞事體歸一而無互異矣奉

巡撫陳 批該府設流伊始犴狴誠不可無仰候會議奏

請明文至日施行繳又蒙

巡按劉 批本府添設獄官吏皆不可少既經會議相同依擬候通詳會

奏施行此繳

一為陳末議以正士風事本司呈請武定府恩貢緣由議得學校乃興育賢才之地教化風俗之源故

古用夏變夷之道皆由於天文德以化導之也今照武定府古居夷羅之鄉原無學校之設雖係土司先年亦有人材向因倡明之無地致每寄業於他庠是以數十年來不霑禮教遂爾習性獷悍叛逆屢萌近既勦除賊祖改設流司則建立學校以闡揚風教實用夏變夷之首務而長治久安之令圖也既奉

前撫院條陳題

請又該前提學道選取軍民子弟八十餘名俱給衣巾補廩補增充附於上年科舉亦嘗考選應試又將各處寄學廩膳生員羅一龍馬士揚金鑑發回該

府儒學領袖傳經選委鎮南州儒學訓導楊向春
罷管學事訓誨生徒逾三年矣適遇

恩貢重典乃拔賢新例誠當普及以示鼓舞作興之機
見准該道移關前來各職會同看得此有關邊方
右文丕變之化而

恩貢機會實所難逢今據合學生員馬仕等比例懇呈
又經該府覆議詳報且該學既有教官楊向春署
管庠事又有生員幾百輩教育於其中况去年考
選科舉已經三年大比之典尤當一體選貢用啓
拔賢入監之途但未頒印除官似於事體相應呈
請合候詳允請乞

本院會催

吏禮二部速賜題發

請頒除該學印信教官以便遵行本司仍移關提學道
候明文至日將該府見在廩膳生員久照府學事
例考選應補

恩貢給文起送庶文教溥及於遐荒人亦由此而奮起
其於夷方不深有所裨益乎奉

巡撫陳 批該府當改流之始建學宣教尤其首
務本院先經咨部未允回復如擬催行題

請至於該學樂群之士濟濟脩文嚮化况大比之典既
以考應則

恩貢之例尤所當援也准行提學道候明文至日考選
補數給文起送此繳又蒙

巡按田 批既名曰

恩貢其該考選也無疑矣但無官無印何以起送合候
撫院批示施行報繳

一為仰仗

天威會兵勦滅久叛夷酋地方寧謐查錄功罪人員懇
乞

聖明俯賜勸懲以勵人心事本司呈犯人任繡王本嵩
招由該武定府審看得任繡始為嬰孤墉以當賊
鋒幾于不免繼而聯衆心以効死守幸保無虞

其擒斬之績無聞然而守城之功可取但既承軍
門犒兵之命當盡潔已奉公之誠乃於勸勦之時
反肆貪饗之念律之以罪更復何辭又查得張監
軍失事在一月之先而任繡犒兵在一月之後時
日相去不為不久若以張監軍失事之故而坐任
繡之罪不無可憫况任繡羅雄之行止於勞賞而
調遣者濬之兵屬之周詩此者濬尚在可以面證
其王本嵩本以一吏之微能隨三軍之後親戰陣
而危亡不避冒矢石而斬獲功多縱有微罪似可
寬宥况王一心與繼祖陰謀密約方有交相扇禍
之心而本嵩即能倡義賈勇預為先事式遏之計

即本高傾家募兵且不足論其後王一心之詐得以不售而鳳繼祖之兵至於寡助或者本高與有力矣况妄殺良民既無姓名可攷而勾倩目把又無實跡可據似此一吏縱不錄其功似當緩其罪其任繡索受土官者濬馬疋相應引例但當日守城之時死中求生合無以功贖罪姑擬徒罪發落蒙問擬繡出使受饋徒罪王本高不應杖罪各納贖復職還役招解到司覆審得任繡調撥武定適遇逆賊攻城甚危隨委督軍守城晝夜防禦二十餘日方得解圍雖無擒斬之功而保全孤城生命與有功勞繼在府受賞差犒土官探聽緩急宜即

速報却乃延住受賄以故不錄其功仍究其罪發仰雲南府查據者濬呈執止送下程原未送馬情由在卷但張僉事失營被執在七月終乃賞軍之先任繡承差在九月中乃賊遁之後細閱卷案查無催軍文檄委非失誤軍機其索受夷財事干曖昧法當例遣緣馬匹量折坐贓該府詳議守城有功姑免引例擬徒贖罪似亦足以示懲王本高既知王一心私通逆賊煽亂時當首官擒勦乃擅自募兵報讎雖稱報効之勤難免輕率之過但會傾產募兵出哨擒斬隨征冒矢驗皆叛賊原非良民屢經紀功明白今該府遍訪週查無一人出許又

經通把角俸等面執稱無戕害人民尤有可據及查勾倩土目赴京妄奏一節乃軍前自領募兵訪無勾倩其差往赴京原奉

軍門呂 差遣齋投本揭亦非引領土目奏事情亦可原將繡與王本嵩俱照原擬具招呈蒙

巡按田 批按察司再加研審的確毋縱母枉招詳以憑具

奏施行并原調者濬文卷送查繳隨蒙本司徐按察使會同布政司鄔左布政使守巡等道朱左叅政楊僉事提取繡與王本嵩到官覆研審得繡執稱監軍張僉事於四十五年七月二十九日失營被

執繡至九月十八日方奉

軍門呂 差齋公文銀牌段疋前往羅雄州犒賞

土官者濬催調伊兵前去東川探賊把隘繡委違例索受者濬下程馬匹在彼延緩一箇月方纔回

報是的是其張僉事失營被執並不係繡催兵遲悞

所致今武定府勘繡曾有守城之功姑免例遣但

繡既索受土夷財物及催兵稽遲情犯可惡於例

允合及審王本嵩始因王一心暗與鳳繼祖合謀

反叛本嵩緝知始雖慮惡隱忍後曾密切稟告以

王一心痛恨本嵩泄謀又橫遭刦燒家財房屋辱

其婦女直欲害嵩性命未遂其奸繼因鳳繼祖叛

調王一心兵馬隨征一心又與繼祖密約助逆本
嵩稔知奸謀欲圖併殄惡逆變產募兵隨征報効
蒙

軍門呂 賞銀四百兩以補募兵之費本嵩固辭
不受蒙嘉義賞勸分遣本嵩攻勦賊寨委身奮勇
屢獲功次俱經紀功各司道委官驗審明白皆係
真正賊黨並無戕及平民又審王本嵩勾倩土兵
赴京妄奏情由據本嵩訴稱隆慶元年五月內

軍門呂 聞報起程令嵩隨帶軍前募兵防奸護
送至湖廣荆門州打發各兵回還差嵩領齋

軍門呂 辯明心跡本揭赴京是的後被不知何

人猜疑謗嵩勾倩土目赴京妄奏切思嵩既有妄
奏不知所奏何事必有奏行勘合為據今既無影
無蹤供認况時有奏事者係總督衙門兜攬棍徒
當已緝獲招明問遣與嵩無干等情蒙本司詳看
得任繡承遣齋犒土官催兵把隘乃敢貪索賄饋
稽緩月餘彼時失悞軍機戕害張僉事雖非其罪
然受夷財物稽遲調兵明例具載縱有守城之功
較其罪亦難准贖仍合盡法引例遣戍邊衛以為
將官貪鄙玩事之戒王本嵩變產募兵倡勇報効
志雖在於復讐計欲殄乎逆黨委身出哨擒斬功
多已經紀功委官審驗俱係真正賊黨又經三司

各道會看得本嵩率兵奮勇斬獲功多功應併叙類呈

前軍門呂 題奉勘合查覈原叙惟錄其功未論其罪今照原題本內查審尤得備悉祇緣本犯奉

前軍門呂 差齎辯明心跡內多開總鎮中傷善類等情本揭赴京投遞致生疑忌其戕害平民一節既該武定府差人遍歷鄉村細加查察並無被殺良民姓名又無被害一人出告等情已有的據則本嵩功次宜叙而戕害平民委無實跡可罪其勾倩土目赴京妄奏審係奉前

軍門呂 遣嵩隨帶軍前募兵防奸護送領布政司應付牌票前去護送荆門州發兵回還原非勾倩土目亦無妄奏即今未有奏行勘合無所爲據當時路遇目把人等并奏事者仍係總府堯攬棍徒吳朝用等一十二名在京妄奏隨蒙

巡視南城察院饒 緝獲奏奉

欽依發遣似出有因即此本嵩祇因公差致咎情已顯然故

前院劉 叅本內開戕害平民原未指有姓名勾倩妄奏原未指有事件亦以其事無實據而情尚有可原耳况嵩昔能變產募兵義卻官賞銀四百

兩亦自難泯二司會勘

軍門題

請皆在叙功之列今既不錄其功亦或當原其罪此雖一吏蓋法體所在以後倘遇地方有事奉有

軍門差遣未免用人若不原情申理何以激勸將來使捐力報効服其心而正法紀乎故在本嵩相應准贖還役將繡改擬王本嵩仍依原擬再問罪犯奉

巡撫陳 批據招任繡承委催兵把隘違例索受夷財雖無失悞乎軍機難追稽遲之愆咎守城固可錄其勞而論功實不能掩其罪也擬遣允宜王

本嵩募兵報効志切殄除逆首委身鋒鏑前院之奏錄尤當併叙祇因防奸護送遂致忌害平民輿論既昭應原其罪如擬任繡候

按院奏請明文至日施行王本嵩贖元還役取實收收管繳又蒙

巡按田 批依擬候奏

請明文至日施行

一為巡撫地方事本司議呈叅將有司交接禮儀緣由該本司掌印按察使徐 會同布都二司并各該道為照臨元地方近改設叅將本為控禦土司管轄漢土官兵懾服夷情督捕盜賊以為戢寧地

方之計正宜文武協心共分猷念以計安地方斯
朝廷分建庶職意也未有不以地方為意徒能各立
門戶互生猜疑負氣爭衡以求自伸即可謂之知
政體即可謂之賢而有裨地方者乎原奉

勅書開載甚明及各司道議案亦已詳悉行之未久而
巡捕土司等官漸成玩愒甚至有各該府官考註
所屬官且不論其官常何如止云與叅將相抗為優
者此豈明於政之大體而實心為地方計者哉以
致做做成風事體掣肘難行該叅亦不得已乃有
此請但議叅將與有司交接禮體往來文移屢經
司道覆議照依省中都司事規除各府知府以賓

主優遇外同知通判推官於大門下馬由甬道入
知州知縣各用官銜手本由角門入俱賓王禮待
教官進謁亦用官銜手本行一禮各府經歷知事
照磨州同州判吏目縣丞主簿典史俱用脚色手
本由角門入庭叅行兩禮其往來文移叅將府無
經歷司者行各府經歷司呈堂如各府行叅將文移
照會經歷司轉呈或事干地方急務不必轉文
俱用手本知會各州縣查照原與都司往來文
移體式作速回報節奉詳允似為妥當相應照舊
遵行其府州縣巡捕官員聽屬提調一節看得各
處叅府得以提調有司原無定規若於往來文移

有關軍務夷情槩不相關白承行及至該地方又
不出一見恐彼此隔絕致悞地方大計將誰諉
殊爲未便相應酌處合候詳允本司備行臨安兵
備道及該守巡道轉行所屬臨安廣南元江鎮沅
澂江廣西等府州縣巡捕官員并各土司遵照今
後凡地方事務有關參府者俱要查照成案體式
府巡捕官具由牒府照會經歷司轉爲呈達州縣
巡捕官并土司等官俱徑自呈報如該參有奉上
行移文書各官亦要作速承行回報倘遇事應面
議者須照前相接禮體面會議處施行蓋地方重
務所宜集慮籌畫以資保障若事關地方該府有

司巡捕官漫不相關白該參致悞地方大計倘事
干利害該參得以藉口各官與有責焉如該參
到地方各有司徑不出一見及奉文移仍前怠玩
遲悞者聽該參具手本移行該兵備道及守巡道
查實輕則該道徑自處分或提該吏問罪重則參
呈

兩院究治凡該參於地方一切事務仍亦虛心竭
誠以効同舟共濟之義蓋以地方戎政爲重不以
小嫌持念此古大將風度也本司仍行該參遵照
如此庶幾體統相維志意自安事無掣肘而於地
方保障至計胥有攸賴矣合就通行呈請爲此奉

巡撫陳 批臨安地方內雜蠻戎外連交趾寔爲
要害之遐陬所以改設叅將控制諸夷誠乃責任
至重必賴體統相維六郡交接禮體該司又有
成議而各官往往玩違効尤以致動多掣肘豈共
濟之公平該司此議良得辨履定志之意如擬移
行各道督行各府州縣掌印巡捕流土人員務遵
成案凡有事關地方重務俱要相承應面議者即
行面議應回報者作速回報若再仍前抗傲稽遲
致悞邊陲大計輕則各道徑處重則叅呈此繳又
蒙

巡按田 批依擬行各道轉行各府州縣遵照議

定禮節交接違者究 此繳

一爲酌議查革冗費民壯以甦民困事本司議呈查
革冗費民壯緣由會看得滇南僻處遐荒事體與
中土不同中土多以民爲壯兵而滇省漢夷雜處
軍民錯居軍有十分七八民止十之二三各該地
方原係衛所食糧官軍并土司官舍防禦有司百
姓止是編當本等徃差俱係親身應役原未設有
民壯團練近奉勘合查照舊額召募乃通行之各
省者繼因逆祖叛亂武定府密邇省城恐無策應
故槩行州縣議處募兵以固守城池爲務本出權
宜濟便之計原非舊額後蒙

本院明文遂行停革而各州縣有遵奉停革者有至今影射虛名在官冒濫工食者有先遵停革後又援申增復者夫地方既有衛所官軍土司官舍備禦兼立保甲各相嚴警足爲防守其民兵自編設以來未有實用多係軍餘包攬或官吏折收工食以克囊橐况滇省山多田少土瘠民貧雜泛浩繁民多疲困即民兵冗役工食何堪派累如近省嵩明一州原募之兵則百有五名可謂甚多所費工食四百八十餘兩尤爲太重後奉停革而該州影射留用况今築有州城嚴固兼有楊林守禦所隣壤援應何必增募兵民防守乎前項工食雖已

抽扣二十名解部濟邊尚餘兵八十五名虛糜工食重派丁糧如晉寧州之兵先已革除又援申增復如姚州大姚二州縣之兵原設二百餘名雖遵停革仍留大半在官先議抽取濟邊今又允革惟永昌府先已革除即永昌嵩明晉寧姚州大姚五府州縣民壯如此其因革不常紛更無定其他屬州縣可知已及查賦役書冊有已革者而民蒙減省之惠有未革者而民受科派之擾且扣解濟邊民兵先已議允今姚安府屬又已允革以致通省政體不一蓋緣未經清查故耳通應查處合候詳允通行各道轉行各府將所屬州縣民兵原未設

有近奉明文權宜召募者要見若干名工食每名若干係何項官銀議給內奉布政司議允扣解濟邊若干後奉停革已若干名見今未革若干名要見既已奉文停革該衙門何又故違影射留用中間有何情弊或有援申增復若干名已革者原議工食銀兩支給過若干餘剩見貯何處有無侵隱即今清查某府某州縣有某衛所食糧官軍及避遠州縣有某土司官舍防禦保障如無土司去處原議設民兵應否存留或令保甲防守逐一查議明白呈詳各道再加酌議通詳革去責成衛所官軍土司官舍防禦保障地方不許仍前影射增復

冗費工食以累貧民其抽解濟邊工食銀兩仍聽布政司酌議將賦役書冊改正通行遵守庶小民免科徵之擾而政體有畫一之規矣奉

巡撫陳 批滇徼較之中州時勢夏異民壯多役

頗冗本院業已久行兵巡道裁省矣何為各屬猶有影射朦朧妄申以致法無定守耶據議具見協心共濟搏節冗食愛養窮氓之意如擬行各道着實清查酌議革存事宜通詳報奪餘悉照行此繳一為儲養將材以壯戎政事議詳武館官生公費緣由看得滇省武館係新創建本為儲養將材以裨實用其訓誨教官廩給與武生考賞花紅等項固

應處給以示作興但該司原無堪動官銀今欲將
在外臨安等二十三衛禦所已徵完隆慶三年分
近奉例裁革發回進

表盤纏銀九十五兩七錢解送支用似為相應以後每
年照額徵解該司收貯以備武館官生廩給花紅
弓矢紙筆等項動支亦應候會議公費允日照舊
編解合候詳允移行都司除在省左等六衛外通
行在外臨安等二十三衛禦所將前隆慶三年分
徵完發回進

表盤纏銀九十五兩七錢照數解該司收支其下年仍
候本司會議各衛所公費支銷允日另行聽各委

官照額編徵解給以備武館教官廩給與武生考
試花紅弓矢紙筆等項支用按季填報循環查考
不許別項動支其前發回各衛所銀兩如有別項
已經正支動用亦要聲說明白聽該司另議呈請
不許重派以累各軍庶錢糧本出於額辦而官生
胥奮於作養矣奉

巡撫陳批如議行繳

一為查理庫貯贓衣以濟給獄囚孤老寒苦事議給
囚衣緣由照得滇省地方寒暑不均冬深天氣覺冷各
獄重囚與養濟孤老身無完衣者甚衆每至凍斃
節查雲南府并昆明縣各監人犯內情真罪當者

固有中間干累情可矜疑者亦多每以寒氣侵入
束手待斃已經行據雲南府將該府并昆明縣在
庫贓衣與作監囚犯查報前來其贓衣內有新鮮
者收候

本院委官查盤估價變賣有破爛不堪變賣者相
應量給獄囚孤老庶不受凍等因開報到司相應
處恤合候詳允備行雲南府該府并昆明縣庫收
貯贓衣清查新鮮堪以變賣與破爛不堪變賣者
分別二項內將新鮮者仍舊收貯聽候

本院委官查盤估價時價變賣作正其不堪者量
給在獄無衣囚犯李伏生等有餘給孤老以濟日
前寒苦仍將量給過數目緣由造冊各另呈報備查
其獄囚孤老受凍不獨雲南昆明縣爲然而外屬
府州縣似多有之亦應移行各兵備分巡道道行
所屬府州縣俱照在省府縣前項事規各將在庫
贓衣清查堪用者收候委官查盤變賣內有不堪
變賣者量給獄囚孤老呈詳該道酌量給賞完日
仍將給散過囚犯孤老贓衣數目呈報
兩院查考如無囚犯照舊收貯作正不許乘機侵
盜庶贓衣不致滯爛無用而獄囚孤老得免啼寒
之苦矣奉

巡撫陳 批如擬行雲南府昆明縣并各通行所

屬遵照將庫貯贓衣其間新鮮及段帛者仍存留
候查盤變價餘布衣不堪者給賞號寒獄囚孤老
如事未結正者不得擅費致啓犯人展辯之端仍
嚴查禁吏庫乘機侵隱虛冒之弊此繳

巡按劉 批查贓衣覆犴狴誠得下車泣罪之遺
意矣卽如議行分巡各道一一查之具報繳

一爲陳三事以塞鰥曠事議詳分巡臨元道呈條三
事緣由看得所呈三事其一責實編以蘇軍困委
果滇中衛所軍餘橫受科派無名冗濫在省左等
六衛及在外各衛所餘丁積弊相同其二查器械
以惜軍需乃爲除戎器以戒不虞其三設督捕以

控盜賊以保守地要務俱應酌處對欸開陳合候
詳乞移行都司并各道查照議處通詳庶軍餘積
弊稍蘇戎器有備無患而地方得藉以保障矣
一曰責實編以蘇軍困

前件本司看得該道所呈責實編以蘇軍困欲
委官查審六涼越州宜良衛所餘丁編銀在
官支銷酌議夫數多寡均編徵銀在官臨時
雇募一節爲照滇雲僻在遐荒衆建衛所本
欲賴之守禦地方以弭盜安民也其間武官
能守已恤軍者固有但軍政久弛官常欠慎
惟剝軍肥已爲念以爲軍之蠹者類多生是

差役徧累而不均之費繁冗而不節軍餘困
匱至有貧苦徹骨不能聊生而逃且死者其
何忍哉據六涼越州宜良衛所知編有公費
銀兩又分外剝取如表夫歲議有官銀一十
二兩而又濫設表夫三名司道衙門各有付
物鋪陳歲編銀一十二兩衛所官心紅紙割
歲編銀八十餘兩可謂有餘而又取餘丁二
十名貼為紙戶徵派重科出辦艱苦此六越
宜三衛所之弊然也如在省左等六衛額僉
識字軍三百餘名為催徵錢糧應辦公務輪
流充當猶民間見年里甲也里甲繁費近本

司會議節省通呈蒙

本院詳允徵銀官當支銷刊刻成書民均沾
惠顧滇中軍多民少軍餘困累尤甚宜為裁
處查得六衛軍有揭帖共三十名貼餘丁五
百名每名徵銀七錢該銀三百五十兩旗甲
二十九名貼餘丁二百八十二名每名亦徵
銀七錢該銀二百九十七兩四錢木廠三十名貼餘丁
一百一十一名每名亦徵銀七錢該銀八十四兩七錢
此差幫貼餘丁雖多受累猶重如揭絲貼黃
日生坐糧管屯清軍優俸戶優等項共約貼
餘丁該四百七十四名每名徵銀七錢該銀

一百八十九兩六錢此差幫貼餘丁雖少受累猶輕以上輕重各差共餘丁有一千三百七十七名該銀八十二兩七錢尚有分外誅求指一科十百孔千澆費出無算漫無稽考此在省六衛之弊然也夫計其徵銀如此之多加派如此之重軍餘如此其困累而在官又稱公費不敷此其故何歟有二弊焉蓋由審編軍丁之不公徵收支放之無法耳惟審編不公則賣富差貧將富者役占私家累年不當一差貧者連編重役歲無空月月無空日且多係屯急不知應納之數任其加科中間有納銀而又當差者有已

當差而又納銀者使富者愈富貧者愈貧苦樂不均莫有甚焉惟徵收支放無法則公費在軍而不在官旗甲便於包當私下易於加派卽所用非所徵所徵非所用而所放又非所收之數上下朦朧奸弊叢作公費不節莫有甚焉凡此二弊恐不止六衛所并六涼越州宜涼衛所爲然其迤東迤西各衛所類亦有之可不爲之處恤哉但地方有衝僻繁簡之不同公需有前後損益之互異因地制宜補偏揆弊以思可行可久斯計之得也相應通行酌議合候詳乞將在省左等六衛移行

守巡道會同都司六涼越州宜良衛所移行
分巡道臨元道會同曲靖兵備道其迤東迤
西衛所移行兵備道各選附近廉幹官員行
令各衛所官將餘丁盡數開報嚴行清查除
年六十以上十五以下者照例免編外其餘
要見實在餘丁若干內應撥貼正軍并津貼
各官舉監生員吏承若干餘剩應編徵若干
然後酌議量其地方衝澁繁簡以爲編徵哀
益之數要見某衛所歲用某項銀若干某項
應增應減應革各若干或原議欸未載事出
偶然於禮法所不可已者各量編預備支銷

銀若干以備臨時酌量呈請動用共計用公
費銀若干逐欸查議停當將前餘丁均筭通
融編派分別上中下委見上丁每丁該銀若
干中丁每丁該銀若干下丁每丁該銀若干
一一編定共該銀若干以足前項公費實數
以後三年一審其餘丁銀數俱令該伍當年
識字軍照數催赴管伍官處完納當給完票
一張執照卽還生理不許留難需索管伍官
將銀解赴本衛所交割內有應解都司者卽行
轉解應存衛所支銷者解寄附近有司庫貯
時遇應用照欸移文赴有司支用其間無附

近有司者聽各道遴委各衛所相應官一員
收支每一年滿日交代以防侵費俱填報循
環查考如有支剩貯庫作止聽候查盤不許
款外分毫支用如有私占賣放分外加收巧
立名色索取見面下程及侵欺那借等弊以
贓重治有拖欠不完者聽各呈究若年終不
完者有司申呈該道將管伍官住俸三月之
上不完者坐以侵欺叅問俱聽各道嚴行稽
查事完造冊通呈詳乞照欵刊成書冊遍發
衛所官吏旗甲軍餘人等未為遵守其有未
盡事宜仍聽各道隨宜酌處停當以為久遠
之圖如此庶差役均而軍餘無偏累冗濫革
而公費自充饒公私俱便上下相安然後可
以備緩急之驅策矣伏乞

鈞裁

二曰查器械以惜軍需

前件本司看得該道所呈查戎器以惜軍需欲
委官清查六涼等衛軍器一節乃除戎器以
戒不虞深為至計委不獨六涼等衛為然如
在省左等六衛軍器俱在旗纛廟積貯零用
者收在都司庫房已經修葺似堪貯放但安置
不如法檢點不以時而腐爛不堪積於無用

者何筭也每年查盤不過照數一點而已何裨實用遇有事領出若收放官不行詳慎任各官軍乘機竊取事畢交官又行抵換及至議動官銀補造監造委官多係軍職各將官銀侵費及至問罪莫贖前愆是軍器積弊因仍已久振劄宜新相應查處合候詳允將在省左等六衛移行守巡道會同都司六涼越州宜良衛所移行分巡臨元道會同兵備道其餘迤東迤西衛所移行各兵備道各委廉幹官員清查要見某衛所原有某樣軍器若干內堪用若干堪修若干壞爛不堪若干堪

用者置造木架如法安置不許雨水浸爛堪修補造者應動何項官銀修補不堪者作何處置或近年庫塌雨水浸爛者免問罪量令補修以裨實用造冊通行繳報俱要點驗明白足數如有侵欺損壞各治以罪仍令賠補以後遇用就於原數內領出事畢照數交官不許抵換取究以後年分但遇查盤俱將軍器照前查過額數造冊聽委官逐件查點堪用者照舊收貯內有損壞堪修及不堪修與補造者查實隨就呈請動支官銀修完如法收貯聽用庶軍需愛惜戎政修明而器械有

備無患矣伏乞

鈞裁

三日設督捕以控盜賊

前件本司看得該道所呈議督捕以控盜賊欲令土婦昂氏于株木箐賊路建立一哨又令土婦海氏與昂氏于稗子溝共建一哨各撥兵夫協守歲動本道紙贖銀兩犒賞各兵委官一員管轄四州各土官舍并修蓋工料人夫官銀如兵夫不足仍於六涼越州曲靖三衛每季輪撥操軍三十名更戍乞行兵備道再計一節誠地方弭盜安民之計相應酌議

合候詳乞移行該道會同曲靖兵備道查議設立督捕責令土婦昂氏海氏將株木箐稗子溝二哨修建各撥兵十五名防守歲動該道紙贖銀兩犒賞修官舍墻垣工料人夫合用銀兩聽二道委官估計通詳動支官銀修理遴選附近相應委官一員管轄彌勒師路南六涼四州鄰近村寨其龍承祖秦世文昂氏海氏四土官舍各撥通把二名統馭夷兵悉聽本官策束督捕務令各官舍常川在彼率領軍兵巡邏地方緝捕盜賊使土酋有所控馭不敢玩寇殃民每季終將捕獲盜賊起

數呈報兵巡二道酌量獎賞其委官以年終更替軍兵或以每季更番或量地方建立哨房令其在彼常川守捕聽二道酌議詳奪如有擅離信地在家偷安賣放軍兵故縱軍人頂替及遇盜不行緝拏致賊縱橫爲害輕則各道徑行責治重則叅呈兩院究罪以示懲戒庶事體有所責成而地方胥有攸賴矣伏乞

鈞裁

巡撫陳 批軍餘受困之弊誠由審編之不公洎收支之無法耳該道發其端而該司擴其悉寔與

今之六詔三軍百姓同貽甦息之休矣如議與惜戎器立捕哨二款通行該道各照道屬委官審編視倣近議里甲規則酌爲一定之計各另通詳施行此繳

巡按劉 批三司會議明悉丁銀軍器卽移行各道通委查明其建哨撥兵一節臨元道會同曲靖兵備道議詳施行繳

一爲陳愚惘以禪盛治事議呈左衛指揮郭科條陳緣由看得郭科條陳事宜除遵嚴固守以立界限肅清風教以杜幽嫌均平貿易以厭貪猥尊嚴社禮以誠祀事昭明服飾以正名分禁宰耕牛以裕農

用近奉

兩院出示禁革俱已遵照無容別議外其有應興應革通行開立前件逐款酌議合候詳允移行各兵備守巡道通行所屬各衛所遵照呈乞照詳施行計開

一 整饬軍伍以實戎政

前件覆議得各衛所軍士本賴以防禦地方必須平居無事操練既精然後調遣戍征緩急有備雲南省城原設左等六衛操備旗軍月給糧餉所費不貲屢奉明文汰去老弱選補精壯法非不嚴也但緣衛所伍官漫不加

雖常奉文清理徒事虛文以致老弱不堪者仍尚在伍冒支月糧無裨實用今指揮郭科呈要及此操閱之時着實揀選實於軍政有裨相應依擬但前弊不獨省城六衛爲然其他外衛禦所亦皆類此相應移行各兵備守巡道通行所屬各該衛所掌印管操官各將見操軍士逐名清理如有老弱不堪見有子孫精壯者即令頂補若無子孫聽繼者即將名糧截除類造單冊清勾各戶內壯丁頂補食糧差操仍將汰退收補姓名造冊通行繳報查考則行伍不致空虛錢糧免于冒濫操守

用近奉

兩院出示禁革俱已遵照無容別議外其有應興應革通行開立前件逐款酌議合候詳允移行各兵備守巡道通行所屬各衛所遵照呈乞照詳施行計開

一 整饬軍伍以實戎政

前件覆議得各衛所軍士本賴以防禦地方必須平居無事操練既精然後調遣戍征緩急有備雲南省城原設左等六衛操備旗軍月給糧餉所費不貲屢奉明文汰去老弱選補精壯法非不嚴也但緣衛所伍官漫不加意

雖常奉文清理徒事虛文以致老弱不堪者仍尚在伍冒支月糧無裨實用今指揮郭科呈要及此操閱之時着實揀選實於軍政有裨相應依擬但前弊不獨省城六衛爲然其他外衛禦所亦皆類此相應移行各兵備守巡道通行所屬各該衛所掌印管操官各將見操軍士逐名清理如有老弱不堪見有子孫精壯者即令頂補若無子孫聽繼者即將名糧截除類造單冊清勾各戶內壯丁頂補食糧差操仍將汰退收補姓名造冊通行繳報查考則行伍不致空虛錢糧免于冒濫操守

有備伏乞

鈞裁

一舉正土軍以壯兵威

前件覆議得雲南遠在邊徼夷獍錯居洪武克服之初民間歸附收集充爲土軍不支糧餉自備軍裝春夏秋三季聽其歸農冬季赴操即古寓兵於農之意法甚善也後奉勘合每年每名認納差銀伍錢解赴布政司給各土官指揮千百戶准俸近因呈貢縣軍民告稱四達民少差繁議乞于本縣設立一堡掣撥附近百戶艾栢所土軍九十餘名免其操備

納銀協幫夫役扛擡遞送里甲雖云少甦而土軍不免漸減今指揮郭科慮恐各州縣攀援爲例議堡掣軍蓋亦防微杜漸之意相應移行各兵備守巡道通行所屬各府州縣除呈貢縣外以後不許援此爲例輕議建堡妄掣土軍庶行伍充實操備有人而成規不致紛紛紊亂矣伏乞

鈞裁

一稽廐牧以儲馬政

前件覆議得雲南省城左等六衛操備旗軍原俱賧給官馬以備征操邇年以來衛所官員

漫不清理以致頑軍貪利往往顧倩借人騎
坐駝載間有倒死不行買補至於馬料稻穀
照常冒支是平時養馬徒費錢糧一旦有警
無資實用滇中馬政之弊至此極矣今指揮
郭科所陳亦爲脩復軍政之意不獨省城六
衛爲然而在外各衛所亦多類此弊相應移
行各兵備守巡道通行所屬各衛禦所掌印
管操管伍官員嚴禁旗軍再不許將操馬顧
倩與人騎載致累倒死若有老弱不堪有病
倒死者速令買補仍開具齒毛造冊通行繳
報查考如有仍蹈前弊者許諸人告訐官旗
連坐庶馬政可脩舉而操備有實用矣伏乞

鈞裁

一稽查屯田以充儲額

前件覆議得軍衛屯田原有定籍應納稅糧亦
有定數但天時之荒熟不常而水利之儲洩
無法水衝沙壓旱澇拋荒雖所在亦間有之
夫何軍佃人戶緣此爲奸或以陸地改熟成
田欺隱不行增稅或假旱澇以熟作荒常年
告訐減輕種種滋弊難以枚舉指揮郭科既
悉此弊條陳欲爲稽考似當依擬但屯田之
弊不難清查而委任之官寔難稱職若復

以此委之管屯官員恐積弊未革而屯田先
擾矣相應行屯田各兵備守巡道通行所屬
各衛所掌印管屯官即將所轄屯田查照魚
鱗圖冊及見領種人戶逐一備造圖冊呈送
各該兵備道每衛選委廉能文職官二員督
同該衛管屯官按圖覆畝逐一踏勘除以前
欺隱者姑免追花利外要見某處先係陸地
今改成田畝某處先係拋荒今復成熟量地
起科從實開報仍出示曉諭敢有那移欺隱
者許諸人首告就追花利給賞告人從重治
罪庶夙弊可清屯政脩舉而賦稅少裨矣伏

乞

鈞裁

一祛革宿弊以節民財

前件覆議得衛所官員交代管印一應公座桌
圍之類派取識字旗甲等役習染成風其來
已久雖奉上司軫念時艱隨事釐革其間少
知自愛者固肯節省而因公科歛多事責求
相應禁治但前弊不獨左等六衛爲然其他
衛所皆有之本司已經將衛所公費議呈詳
乞移行各道查照委官清查審編向未議報
相應移行各兵備守巡道并都司查照原行

催督各衛所速將公費餘丁審編議詳自後
新官到任如公座桌圍印褥心紅之類禮制
所不可缺者比照有司官員議定成規於該
衛公費銀內照數支辦著爲定規併議入冊
其餘節儀瑣屑等項虛費嚴行禁革不得踵
襲前弊科害軍識如違許被害之人指實陳
告或僚屬許舉罪坐所由庶軍困少甦貧墨
知警而衛所受惠多矣伏乞

鈞裁

一申飭名分以正紀綱

前件覆議得上下有定名分之所以攸存紀法

嚴明體統之所以不紊故衛所伍官升堂公
座此理法一定而不可廢者邇來武職官員
顧惜名器少知自愛者罔有其人至於闖茸
不才之輩視衛所衙門不啻傳舍自到任公
座之外足跡未嘗一至其地暇則類聚群居
或酣飲宣淫或締交罔利或需索常規或挾
私排陷是平日之所以自處者既不足以取
重於庶官矣至於千百戶鎮撫等官朔望日
期公然不赴街衢出入並馬同行又烏知有
堂屬之分哉相應移行各兵備守巡道通行
所屬各衛千百戶鎮撫等官今後務要恪遵

禮法明辦等威朔望升堂不許不到街市騎馬不許並行如有故違許指名叅治庶體統既正分義相安而各官亦知所樹立矣伏乞

鈞裁

一設牛叢以彌盜賊

前件覆議得滇雲曠遠所在盜賊不時出沒近奉

本院設立保甲之法有事則互相應援平時則互相覺察所以厚風俗齊人心弭盜安民之計無出於此也今指揮郭科所呈即今年歲荒早乞要沿村設立牛叢及令總捕指揮

精選壯丁各置器械朔望會齊操練約正覺察勤惰巡捕官以時查考一節固思患預防之計但牛叢之壯丁不外於保甲之人戶若更令總捕指揮再行精選不時稽查恐委任未必得人而地方多一騷擾似難准行相應移行各兵備守巡道通行所屬各軍衛有司巡捕掌印官責令各該約正務要遵照頒行明示十甲人戶平居無事則稽查出入一旦有警則協力應援其擒捕有功者查照獎賞若怠直失事者如律治罪庶防範嚴密而民不稱擾勸懲有法而盜賊可弭矣伏乞

海峽行錄
卷三
三
鈞裁

一 疏通水利以便敷蓄

前件覆議得民生所給莫重於三農而農事所資莫先於水利雲南省城軍民田地先年開築東西二溝寶象等河六衛則設有巡水等官府縣則設有老人牌甲等役每遇年終司道巡視委官照例起倩夫役以時脩完疏通灌溉業有定規今指揮郭科條陳完河每延至於正二月將河水盡掣歸海方纔興工以致下秋無水栽種尤難近該本司會議呈免革刷霸官已經另行委官司水啓閉今據報

稱半月之內泉水儲積已滿其有助水利甚便軍民得蒙溉潤之澤乞要改於冬涸之時委官開完責限完報是亦日擊時弊相應依擬合移行屯田道今後每遇冬晴卽委勤能職官督同管水官役照例起倩人夫將各河溝開完疏通限正月十五日以前呈遞完結十五日以後各閘就便聚水以候佈種仍令雲南府總管水利官員逐處查考着實舉行先期完報者量行獎賞若苟且塞責過期不完者重加罰治如此庶開完有時儲泄有度水利興而農務舉矣伏乞

鈞裁

一慎選木鐸以敦風教

前件覆議得僉設木鐸所以宣揚

聖諭訓戒軍民其役固微而其責頗重誠非蠢愚之輩所當濫與其選也今指揮郭科條陳原役多有買求濫充之弊乞要慎選幼年讀書曉義齒德皆優者仍撥巡夜總甲一人隨伴雪雨巡行多困一節固亦有見但僉報木鐸止憑里老地方而里老地方不免踵習前弊且摘撥總甲雪雨伴行恐舉一事而生一弊反啓煩擾之端殊屬未便應行各兵備守巡道通行所屬有司軍衛除已往見役者姑仍其舊

將來僉報者必慎其選務要尚義明禮聲言嘹亮齒德素孚者方許僉舉若有不通字義問答舛訛及怠職壞事許令鄉約會衆卽行舉首查革庶木鐸得人夙弊幸清而地方有賴矣伏乞

鈞裁

巡撫陳 批各條陳事件既復議明白如擬移行各道通行所屬遵照施行此繳

巡按劉 批該司覆議明悉俱如擬行軍伍馬政責之兵備屯田水利責之屯田道務要著實舉行毋徒爲冰鏡燭龍可也其餘保甲况善於牛叢木

鐸且寓於鄉約又不必瑣屑以沿弊矣但飭名分以正紀綱乃一篇之要領尤當申嚴以懲不恪仍卽通行知會遵守繳

一爲嚴緝捕以安地方事照得滇省僻遠遐荒軍民雜處有偏野夷民罔知耕稼爲業惟以劫搶爲生節經撫處近以鄉約教化保甲稽嚴向覺夷俗漸改盜賊稍寧今年因雨澤失時木苗少插秋成少實小民乏食故夷民仍復糾夥出劫而各衙門巡捕官舍不卽督兵追趕却待賊遠尋踪明屬縱寇殃民除另行查究外擬合通行嚴捕爲此案仰本府通行所屬州縣衛禦所流土衙門卽行各堂印

官該管地方嚴查保甲巡捕官舍在外晝夜巡邏每日分班差人於賊處逕路同伏遇有賊出卽便督率兵勇牛叢併力剿捕毋令入境劫搶務使盜息民安以靖地方如巡捕官舍敢有坐視偷安遇賊不行追捕以致地方失事玩寇殃民者定將各巡捕官舍從重叅究决不輕貸先具巡捕官舍不致違悞結狀呈來

一爲摘陳弭盜之畧以急救地方事覆議分巡安普道俞事蘇 條陳緣由該本司看得該道條陳稽哨守明連坐恤官軍考鄉約復社倉等五事俱於地方弭盜有裨中間有於政體民情似當酌處者逐

一開列前件對款覆議呈請合候詳允移行守巡兵備道通行所屬府州縣遵照著實舉行呈乞照詳施行

計開

一曰稽哨守之弊

前件覆議得滇省地方山箐峻險盜賊易於竊發先年建設要路哨堡巡司分布官軍兵勇守把本謂禦寇安民至計節奉

兩院案約嚴查哨守各該官兵猶多因循踈濶今該道目擊此弊條議行令守巡兵備道選委指揮協同州縣正官通歷各哨查點官

軍沙汰老弱撥補逃亡整理器械置立循環稽查盜賊一節誠符弭盜安民之意相應依擬移行守巡兵備道遵照會選廉幹指揮一員協同州縣正官通歷所管軍民哨堡巡司將各官軍勇夫弓兵逐一查點內有不到者掌印官提問招報逃亡事故者作速僉補老弱不堪者卽爲沙汰器械未備者速令整理各巡捕哨守官舍用心巡邏掌印官不時稽察務使哨堡嚴密軍威振肅不許指稱點哨科缺下程紙張等項騷擾官兵自干物議各州縣仍置循環文簿二册申請兵備道印發

按月逐日將各地方有無賊盜緣由登記季終送道倒換稽查年終照例類呈兩院查考如有拏獲真盜者量功犒賞縱賊未獲者一次將各流土巡捕哨官哨頭住支俸糧戴罪緝捕二次以上拏解本院細打照例叅問尤恐稽查嚴切各該官舍或有誣執平民以希塞責及有私行拷問因而致死爲害不小查有此弊或被人告發定行引照將良民誣指爲盜及酷刑事例從重究遣不事姑息庶法紀申明而官兵知警哨守嚴密而群醜遠遁矣伏乞

鈞裁

二曰明連坐之法

前件覆議得該道所陳欲各哨委官將伍哨總置團牌書名僉立甲頭共爲信地協力捕賊失事連坐一節誠爲聯束哨守警飭官軍之意但查得別卷爲立法傳牌會哨以靖地方事先該雲南都司條呈

巡撫陳 批行布政司會同各司道議將東西南三路哨守計度程途分屬都司并瀾滄金騰二兵備道各置長柄傳牌十二面接編天地玄黃等字號印給紙單隨牌往廻自隆

慶三年八月初一日為始傳牌會哨填寫單格奉到月日官軍姓名地方有無盜賊出沒字樣傳至界止遞回省城接单呈繳

本院查驗緣由議呈詳允通行遵照在卷今該道條議大畧相同不必重置團牌以滋煩擾第哨堡界止有遠近不同而額設官兵有多寡不一若照伍哨編為一牌恐有哨堡懸隔數里者總計程途寫遠倉卒有警傳報不前未免悞事相應申明酌處如遇一哨境內盜賊生發責令附近左右二哨官兵互相救援如坐視不救連坐治罪庶道理連壞等援

易及合移行守巡兵備道轉行守備并各府州縣禦所衙門通行所管軍民哨堡巡司遵照今後各該官軍兵勇常川在哨演習武藝傳牌傳哨往來巡邏不許偷安疎虞如一哨境內遇有盜賊生發哨頭即鳴鑼吹角放炮為號附近左右二哨官兵即刻取齊無分彼此互相策應協力追捕若賊勢重大聚集牛叢人等跟踪截殺將真正賊賊擒拏解報量功犒賞敢再仍前坐視遲遲縱盜滋蔓者定將本哨并左右二哨失事官兵一體連坐治罪仍拏哨官哨頭轉解

兩院細打決不姑息庶地界適均而傳報爲
便哨堡聯衆而人心自奮矣伏乞

鈞裁

三日恤官軍之私

前件覆議得該道所陳各哨官軍口糧多寡不
一定爲中制每月給米七斗每斗折銀五分
房屋傾頽卽爲修理川原平行行令開墾州
縣佐貳管伍叫差員役不許掣擾役占一節
誠爲優恤官軍之意但哨兵口糧布政司議
有規則隨行該司回稱查得各衛軍哨口糧
俱係三分旗軍如總旗每名月支本色米一

石二斗小旗一石一斗軍人一石折色每石
折銀四錢其各府州縣民哨兵勇口糧原係
各該守巡兵備等道建設酌量地方緩急議
給口糧各支不等除親身應役不開外有每
名月支本色米三斗者有四斗二升者有四
斗五升者有六斗者折色每斗折銀四分有
歲支銀三兩六錢者有春夏二季每名月支
米七斗秋冬二季共支銀三兩五錢者有春
夏二季每名支米七斗秋冬二季月支銀七
錢有月支稻穀四斗者本司照依各屬申報
會計文冊每年照數坐派存留本折兼放又

經詳名編入賦役書冊通行遵守以爲一定之規等因回報在卷爲照各屬哨守有軍衛之異而糧餉有本折之殊先經司道酌議地方之衝僻分別月糧之多寡行令州縣放給既有成規近又編入賦役冊內似事體已定今欲槩將每名議給米七斗折銀三錢五分恐錢糧有限歲用不貲係干通省斯將來之告增者或紛知也似難別議其哨房之傾頽官私之擾害不獨迤西爲然而東南哨守亦皆有之又訪得巡捕官舍將各軍兵隱占役使包辦月錢尅減口糧多方需騙稍有不遂

非刑責打爲害已非一日誠如該道所陳者相應酌處移行守巡兵備道通行各府嚴行州縣掌印官遵照不妨原務親查所管并附近軍民哨堡房舍內有損壞去處就令各兵採取木石量給瓦片灰釘速爲修理如果傾頽不堪督匠估計料價議動官銀申請委官修蓋不得轉委別官致滋冒破騷擾各兵應得月糧查照原議定規依期放給省令常川在哨住守若有空閑田地聽其開墾種食免其糧差不許輒離信地別境營生各掌印官出其不意將各官兵查點內有不到者量行

責治二次以上究問追奪月糧以懲奸頑仍
出示嚴禁各該巡捕員役并官伍官旗務要
體恤官兵巡邏哨守敢再仍襲舊轍將各軍
兵拘喚役使掣當識字包辦柴草折收月糧
尅減口糧等弊許被害之人陳告定照律例
從重究治其間各哨軍兵月糧有當議處者
聽各兵備守巡道酌量徑自呈詳乞示施行
庶哨堡修復而官軍得所法度申明而宿弊
可祛矣伏乞

鈞裁

四曰考鄉約之成

前件覆議得鄉約之設本爲勸人爲善而保甲
之法亦以格人爲非義本相湏况滇省邊隅
用夏變夷尤爲急務近奉

兩院通行勘合轉行各屬將城市鄉村屯寨
去處不分士夫土著軍民流寓客商之家立
爲鄉約并編保甲遵行已久遠近軍民祇承
德意互相勸戒風俗日漸改觀今該道條稱
城市舉行窮鄉僻壤尚有偏廢行令州縣掌印
官遍歷鄉村將版籍人戶查出編置魚鱗冊
籍稽查一節委於地方風化有裨但造冊事
干通省各該州縣正官多不躬親督修未免

轉委驛巡陰醫等官代查訪得沿村有下程之
需逐戶有紙張之派耽延月日徒事虛文目
今米價騰踴小民饑饉且諸夷伺寨易動難
安魚鱗冊籍似應免造其鄉約保甲二事僻
壤村屯恐未週知遵行相應申飭移行守巡
兵備道通行各府嚴行州縣掌印官不妨原
務親查所管村屯鎮寨嚴諭居住士夫軍民
客商人等遵照勘合事理行令各鄉約保甲
人等止遞名數揭帖到官編立停當便查不
必造冊以省科擾煩費務期著實舉行以敦
厚風俗仍不時稽察以防終怠如再寢廢聽

各掌印官量行戒諭求臻實效毋得轉委驛
巡陰醫等官擾害村廬虛應塞責查訪得出
定行參究事完止具編查過名甲總散揭帖
申報該道亦免造冊具由呈報

兩院查考庶德教覃敷而地方亦不擾矣伏
乞

鈞裁

五曰復社倉之制

前件覆議得該道所陳欲督州縣正官將社倉
着實舉行今歲米價騰貴有義穀去處許借
饑民官倉卽有稻穀呈請賑濟無穀去處查

動庫銀分別給散時熟追還倉庫一節誠惠
民救荒良策查得別卷為應

詔陳言事奉

兩院通行勘合轉行所屬遵照勸諭軍民等
量其貧富各出稍穀或三五十家為一社推
有行誼者為社長社副職掌穀數常年有人
借食前穀者定議出息三分秋成收入一遇
荒年見丁均散富人仗義肯辭者聽官府但
責其必行不許指稱借貸等因通行欽遵訖
今該道條議大畧相同本省地方山多田
少所獲米麥僅足供一歲之用節因兵荒相

一仍公私財力俱因民間仗義輸粟者百無二
三且地濕積穀易腐負累看倉老人官司多
不肯收糴其義倉惟永昌府并騰越州積穀
數千澂江府積穀數百石已有成效而易門
祿豐二縣近亦創立其餘各屬未見舉行即
今米價雖覺騰貴而歲時未為大歉若准散
給官銀并借倉穀恐貧民蠶食費過日後追
賠未免反為遺累矣相應酌處移關守巡兵
備道通行各府州縣遵照嚴督各該鄉約甲
首人等悉照勘合事理并後開欵目如有義
倉去處聽其賑借未曾創立者即令五六十

家爲一社或三四村爲一倉無力起建倉房者許將附近空閑倉廩各立字匾就令約正約副倡率勸諭士夫軍民如有伏羲量行貧富各出稻穀不拘多寡送倉備賑內有義助數多者照格旌賞官給收放文簿二扇登記出入稻穀數目每年不拘社內社外人有借食前穀者量出耗息秋成還倉或有欺騙告官追問積有歲年則生息必多一遇荒年見丁均散不必追償富人不賴此而仗義肯辭者聽年久出陳易新減價平糶敢有侵冒等弊許諸人舉首從重究治各府州縣官但責其必行定立章程使各遵守不許指此別項借貸違者以贓論罪事完卽於徑理紙贖銀內動支買辦紙張脩造義倉收積稻穀數目文冊申繳各道類呈

兩院查考以觀各官之廉貪勤惰如仍前廢閣者列以下考定行參究庶義穀廣儲而賑恤有賴官不煩民不擾矣伏乞

鈞裁

社倉事宜款目於後

前件覆議得該道所陳前項款目倣古酌今似皆可行但中間有三項尚當裁議者其一謂

出穀二百以上給以衣巾生員固鼓舞勸導
之方但衣巾乃禮教所關雖富者不得濫給
重學政也其二謂慳吝不與者紀過於簿固
消沮鄙吝之風但義助本出於人心之樂從
雖吝者不得強勒順民情也其三謂借穀每
石出息一斗固爲積少成多預備博濟之意
但滇省地瘠民貧每石出息一斗恐辦納不
前或當每石止出耗穀五升且救荒之策欲
多方以濟衆貴通變以宜民應於各社倉義
勸之外遇歲豐則動支官銀照依時估收糴
積貯用備賑恤若歲歉則減價出糶以平市
價免穀滯腐或極荒之年則徑發以賑濟不
責其償其間有宜於昔而不宜於今便於此
而不便於彼者聽各府州縣官從宜酌處務
從民便俱移守巡兵備道行各府州縣出示
曉諭嚴督所管地方鄉約義倉着實舉行要
之使上有實政下有實惠而已伏乞

鈞裁

巡撫陳 批據議悉見該道銳情時艱而該司又
酌處乞協時宜俱於地方裨益居多矣如擬通行
各道轉行所屬各一體遵照着實舉行務臻實效
此繳布政司呈蒙

巡按劉 批該道原陳五事咸切時艱該司覆議
尤詳益徵定見至于懼操切而禁止誣執之奸約
策應而責成左右之哨哨糧以衝僻爲差等鄉約
以揭帖爲稽查及夫重學政順民情等因又發該
道未盡之意酌地方可見之行長慮却顧無踰此
矣但義民之冠帶斗息之還倉亦鼓舞之端理財
之道也俱如議行此繳

一爲估修衙宅以正法體事照得本司四兵備道衙
宅二所建自景泰年間風雨飄淋土木圯壞右邊
一所尚堪攙修住坐其左邊空衙久未葺治以致
房屋漸頽止存大樓正廳各三間因循苟簡未舉

嘉靖三十年間止有一二吏承因無公廨稟堂將
本衙借住日久後借居益衆相沿起蓋房舍越分住
居視爲已有久假不歸本非事體向未清查近該
各道會集司內乏衙司外又未設有兵備道衙門
暫於外面別署借住抑爲關防不便本司查知前
弊責限搬移外但各吏承沿習日久遞相賃居已
非朝夕之故姑免問罪隨准各兵備道會同議將
右邊堪住衙宅作爲迤東曲靖臨安五備道官衙其
左邊傾廢者該迤西瀾滄金騰二道共出料價脩
復查照分巡各衙事規監立石扁於門墻之上開
云迤東迤西兵備道衙以後損壞就於各道動支

官銀脩葺隨該本司牌行照磨龔濟世司獄賈奎
查估去後據各官呈稱依蒙帶領各行匠作勘得
本衙委因倒塌年久雖存樓廳各三間止有梁柱
瓦片亦多脫落應該脩理合用木植磚瓦灰勛釘
線顏料油刷等項共用價銀二十六兩五錢五分
其起蓋兩耳廂房六間書房三間書吏房六間皂
隸房二間廚房一間東廁一間門樓二座將各吏
承原蓋房屋改脩攪用庶免廢毀合給吏承糜向
春等十三名木植磚瓦價銀共四十八兩七錢九
分伍厘應用木匠泥水鮮鋸築墻油刷石匠鐵匠
并人夫約共三十名量給工價每名日給米菜食

鹽銀五厘并犒賞等項共銀一十四兩本衙原無
什物合置桌椅床檯磁器鍋缸盆桶衣架等件家
私共該價銀十兩六錢五分五厘四項共銀一百
兩呈乞移行二道動支給發以便興工等因呈報
到司據此該本司掌印按察使徐 會同金騰臨
安瀾滄兵備副使鄒 方 朱 帶管曲靖兵備
僉事譚 看得本司原設兵備四員有衙宅二所
雖各道自有駐劄地方偶爾公務回省一時會集
借歇司外別署委非法體既該各道會議分定責
成將前傾壞衙宅議各兵備道項下紙贖官銀脩
復并置造合用什物一勞永逸誠宜舉行又經行

委各官估議前來本司覆查明白相應呈請合候
詳允移行瀾滄金騰二兵備道於徑理紙贖銀內
動支五十兩俱徑發龔濟世賈奎將內四十八兩
七錢九分五厘給發吏承糜向春等收領候查有
空地另行起蓋吏舍餘銀四十兩五錢五分買辦
物料并給夫匠飯食等項又一十兩六錢五分五
厘置造什物委官監督各行匠作將前估衙宅如
法脩理務令各委官用心督脩置造以期堅固久
遠不許冒破物料苟簡塞責工完造冊繳報如有
此弊覈查得出定行究治其合用匠役暫於都司
借用事畢發回人夫就於本司軍禁三十名內分

班應用日量給飯食以恤其勞自後各吏承如再
有朦朧越任本衙者查出重究不貸庶公署脩復
而法體亦正矣奉

巡撫陳 批准動支脩理此繳

巡按劉 批臬司法紀所在兵道戎務攸關凡駐
劄關防誠當嚴密雖分駐各有信地而時旋省會
豈可借居他署也既有舊基即宜動支委脩其占
住吏承姑免提究完日冊報繳

一為議處改設叅將兵備官員以肅戎務以安地方
事案奉

撫衙門批據分守安普道呈將本道原管武定易

門府所一應錢糧未完卷簿移送洱海道照舊管理緣由批司會議詳報奉此案照先奉

兩院批據瀾滄兵備副使朱 呈本道近奉

勅書仍開有統轄武定易門字樣請乞題

請開除以便管理緣由批司會議通詳奉此本司會同布都二司將武定易門所兵務遵照近奉

勅書屬瀾滄兵備道統轄守巡政務仍屬安普道管理

通呈詳乞移行各道查照管理去後今奉前因該

本司掌印按察使徐 會同布都二司看得武定

易門府所地方原屬瀾滄兵備道統轄後題奉

欽依將安普分巡改爲兵備整飭雲南六衛并轄瀾滄

道所屬武定易門府所兵馬錢糧其安普兵備副

使久未銓除今瀾滄兵備副使朱 近奉

勅書仍前開載整飭武定易門字樣已經會議詳乞遵

照

新命仍屬瀾滄兵備管理其守巡政務雖勘合有通行

安普等道一體查照施行字樣但查原未議有成案似難輕

改况安普道所屬地方自平夷定遠直抵祿豐甚爲廣遠而

衙門有附廓雲南并曲靖尋甸等府屬州縣與在守平夷曲靖

楊林馬隆木密鳳梧安寧等衛所亦爲繁冗而洱海道地方

止楚維姚安一府衛所事務頗簡且瀾滄洱海二道地方共

界同治仍應照舊屬洱海守巡道管理爲便相應

呈請合候詳允移行安普道將原管武定易門府
所一應錢糧卷簿并奉

兩院批呈關送洱海守巡道照舊管理庶地方照
舊爲便而官聯同治順便矣奉

巡撫陳 批武定易門所改屬安普守巡道既無
成議而又實難遙治如議照舊仍行歸復洱海守
巡道管理此繳

巡按劉 批滇中迤東迤西各設二守巡二兵備
道量犬牙以相制酌犄角以相關繁簡適均聲勢
聯絡議者乃欲以武定易門割屬安普爲兵巡而
不知瀾滄北勝調度難周反斷武定之右臂矣今

廟堂既有定鑒仍屬瀾滄兵備則守巡二道俱應仍
舊爲安况守道一體查照字樣原行勘合槩行不
係題覆

欽依之語今據會議詳確即便照舊施行以憑通詳回
銷此繳

一爲勢惡管莊出同未獲強賊挾讐抄搶家財事本
司議獎三泊縣知縣王拱仁挈獲總管莊陳俊趙
科背違勘合私自下鄉科害莊民送官正罪緣由
卷查總府莊田子粒已經議令有司催徵詳允通
行外今群克陳俊趙科并安寧州知州徐守挈獲
婁舉等却乃不奉

欽差違法科擾陳俊趙科私自下龍碭等庄擅受民
詞妄作威福將火頭欺本等夫婦綁打抄搶家財
極其慘酷當得知縣王拱仁拿獲正罪以泄群憤
用懲餘奸除知州徐守候本司另將婁舉等究招
併議呈獎外其知縣王拱仁所獲陳俊等雖經招
呈詳允本官仍行議獎爲照知縣王拱仁器度嚴
凝才識軒爽遵奉勅令而戢勢豪之家人俾奸棍
就縛撫字遐邇而念瘡痍之莊戶若恫瘝在身有
不激不隨之風得鋤強扶弱之體力量足以任事
鎮定足以安民使各該有司皆若本官之爲三泊
也則

朝廷紀法誰敢違犯撥置群兇亦知畏刑小民豈有
橫被吞食吞聲忍氣而不得其所者哉據本官委
屬可嘉相應優獎合候詳允備行雲南府於庫貯
堪動官銀內動支八兩折爲銀花綵段羊果酒禮
行令儒學師生用張鼓樂導送本官以示

鈞臺優禮之典以鼓庶寮砥礪之風及照褒賢則
有志者自興懲怠則不能者斯勸知州徐守知縣
王拱仁雖蒙優獎而怠茸官員不行懲創恐無以
激勵人心仍移行兵備道守巡道嚴督所屬各府
州縣衛所查照原行各上緊將前查勘各田子粒
數目莊民姓名查勘明白限五月以前造冊通行

繳報如過違限期不行勘報聽本司各道叅提究
治仍行有司軍衛驛堡巡司等衙門如有前項群
奸擅持牌面騷擾驛堡私自下鄉科害莊民或倚
勢用強非刑凌害平人者即便嚴拿監候呈詳究
遣方見所司風力定以優註上考如有故違勘合
阿徇勢豪不恤小民縱容管莊家人在地方擾害
者或司道查訪得出或被入告發即將所在軍衛
有司一體拿問仍以罷軟不職論驛堡等官查非
院司掛號徇私應付廩糧馬疋者俱不准支銷仍
提究坐罪仍行各府備呈本鎮再不許背違勘合
混差家人擾害地方自取叅究如此庶群奸肆惡

之風可息而地方軍民之積害可除矣呈乞照詳
施行奉

巡撫陳

批知縣王拱仁遵勘合而歸莊戶於官

收撫遐荒而戢群兇之蚕食獎蠹允別風力足嘉

可以占治最而註上考矣如擬動支獎勵通行知

會禁革施行如有縱容棍徒私自下鄉科擾莊民

倚勢用強非刑肆虐者司道查將應付阿縱各衙

門拿問坐罪罷軟不職一體治罪不貸此繳又蒙

巡按劉批王知縣奉公守正法不屈於豪梁發

伏摘奸令先行於近習即行嘉獎以示激揚仍通

行合省有司一體觀法遵守各相砥礪毋自脂膏

司道仍不時體訪以憑獎戒餘照行繳

一爲嚴禁非法刑具以卹徒囚以重民命事照得節奉勘合屢嚴酷刑之禁所以慎刑獄重民命也故在戍遣以上雖情犯爲重猶當哀矜凡大辟者必會審轉詳待報而後審決軍罪者必反覆推鞠情例允合而後僉解着伍至徒配者情犯尚在可原則惟拘收驛堡使之勞苦服役律所謂徒者奴辱之也慮有脫逃止以鉄鎖連環共重不過三斤犯徒者帶此工作此法也本司偶見在城堡滇陽驛街各徒囚人皆帶最堅實栗木重各至二三十斤木套穿眼以貫其足名爲木靴詢之則曰恐其脫

逃乃爲是刑以加其足也早暮墩禁在地欲水火則不能移步欲飲食則不能行動日復一日致木刻骨成瘡潰濃瀝血嗷嗷無訴多死非辜此何刑具乎滇之人恒曰死徒活軍有自來也蓋緣驛堡官吏識役人等每遇發徒到配輒需見面常規錢如遂已私則令召保買閑或私收月錢賣放回籍或遇查點倩人暫應稍有不遂則不論情犯輕重遽加重責更用前木靴非法刑具以殘虐之是犯輕而刑重斃於非命者多矣可不爲之處恤哉且聞此項不獨省城爲然凡合屬驛堡亦多有之相應通行嚴禁案仰本府當該官吏即便通行所屬

州縣附近衛禦所衙門嚴禁各該驛堡哨守官吏
職役以後發配徒犯不許索取見面常規賣放有
保領者許其召保果係賊犯無人保領者止許依
法錄繫每重不過三斤庶得以行乞聊生至夜收
繫防範徒限滿日即申請釋放不得羈留若有擅
行酷打故用木靴墩禁等項非法刑具磨死詐作
病故者聽各府州縣查實將官吏職役拿問治以
非法拷死之罪參呈解司從重究治招詳
兩院定行黜革毋違未便

